

四庫全書

集部

欽定四庫全書

集部

宋百家詩存卷十二

詳校官監察御史臣孫家賢

主事銜臣徐以坤覆勘

總校官庶吉士臣倉聖脉

校對官中書臣方大川

謄錄監生臣黃鑫

欽定四庫全書

宋百家詩卷十二

嘉善曹庭棟編

紫微集

呂本中字居仁壽州人好問之子公著之曾孫也幼敏悟少長從楊時游酢尹焞遊以公著遺表恩授承務郎坐黨事被黜紹興初召見特賜進士累官中書舍人權直學士院忤時相罷奉祠卒賜諡文清學者

稱東萊先生著作極富詩二十卷得陳黃句法陸放翁謂其汪洋閎肆間出新意愈奇而愈渾淳一時學士宗焉

暮步至江上

客事久輸鸚鵡杯春愁如接鳳皇臺樹陰不礙帆影過  
雨氣卻隨潮信來山似故人堪對飲花如遺恨不重開  
雪離花榭年年事辜負風光取次回

送文潛歸因成一絕奉寄

水天空濶片帆開野岸蕭條送騎回重到張公泊船處

小亭春在鎖青苔

謝無逸秦處度諸人皆許省試後見訪冬夜有  
懷作此詩寄之

八年去東都觸事無一好沈綿淹歲時憂虞滿懷抱欲  
歸故里閭稀復舊耆老悠悠歲欲盡忽忽身向老小堂  
佳有餘所恨來不蚤饑蟲語夜霜踈星亂枯草支撐壞  
壁高側轉寒木小詩書久棄置詞林迹如埽佳人何時  
來路遠音信少庭前冬開花扶杖起千繞春風回馬首

清尊待君倒先期留酒錢仍須具梨棗

晚步江上

大觀二年真州

浦口生春綠未酣南山初見碧  
嘯巖風聲入樹翻歸鳥  
月影浮江倒客帆破甑不堪充酒券  
短裘真欲換朝衫  
往來泥雨城南路可見輕鷗定不凡

怨歌行

借君手中板為君歌一辭辭中宛轉君不曉為君說盡  
長相思輕霜夜渡吳城暖楓葉蘆花秋意晚萬里春隨

驛使歸十年夢逐佳人遠當時笑語似兒劇象牀玉手  
無消息古岸風江千里船咫尺春愁那得憐君不見信  
陵門下客侯嬴不用今頭白

雪盡

大觀三年宿州

雪盡寒仍在園荒春欲歸晴空落鴈少古木聚鴉稀肺  
病猶宜酒囊空合典衣碧雲愁不見千里故山薇

宿青陽驛

燈火客帆盡人煙邨市幽晚風號古木高岸束黃流物

色淮山近春光霧雨愁棲遲舊遊地來豁十年憂

遊南山歸簡張嘉父博士

吾生復何往樂事亦匆匆寶塔千帆外春城萬壑中  
花緣側岸晚照斜空坐想西窗老掀髯一笑同

客居書懷奉寄介狀若谷材仲兼簡信民

客愁如長河浩蕩去不息未來已相關千里在咫尺抱  
疾寄他鄉終年守岑寂中虛耗神志內熱傷筋力長虞  
二豎櫻復有寒餒迫怪渠甌上煙愧爾囊中帛生平所



讀書已如不相識坐貽鄉黨笑敢辭塵埃沒舊遊今幾  
時轉盼忽陳迹死者不復見墓草春已碧生者天一涯  
未免陳蔡厄兒曹乳臭在瞑目分黑白雖無未見書頗  
多雌黃筆出言輒周孔而不辨菽麥啾啾要酬和內顧  
頗牽率坐令懷抱惡更覺天宇窄忽忽十年事俯仰同  
戲劇從來肺腑親翻手吳與越獨餘二三子肝胆猶鐵  
石尚怪東郭貧亦訝懷祖烈西軒來何時簞瓢共饑渴  
念君不能已一飯再三噎誰能明予心皎皎霜夜月

小園

小園常在眼春事已天涯  
雨暗隄前路苔深林外家  
曲池通小徑密樹隱殘花  
長愧鄰翁酒囊空尚可賒

謁雍道士

雍有古畫甚衆盡為郡掾  
取去雍遊貴人門甚熟

紛紛乾沒混泥沙  
暫遣塵言挂齒牙  
妙畫已歸三語掾  
壯遊空記五侯家  
古壇背日藏芳草  
小樹留春放晚花  
能共山翁同活計  
隔林分聽一池蛙

春日即事

病起多情白日遲  
彊來庭下探花期  
雪消池館初春後  
人倚闌干欲暮時  
亂蝶狂蜂俱有意  
兔葵燕麥自無知  
池邊垂柳腰支活  
折盡長條為寄誰

飲酒

人生百歲能幾何  
顧我把酒何不歌  
窮通大抵夢南柯  
我復夢中多蹉跎  
自古英雄亦何有  
往事紛紛只如酒  
嗟予真得酒中趣  
幾度尊前揖星斗  
病起槐陰鶯已老  
今日相逢還草草  
匆匆數日是行人  
且向尊前一傾倒

人生樂事亦難并  
明月清風況都好

偶作

去年芳草又萋萋  
休歎王孫猶未歸  
更覺春深送春鴈  
三三兩兩傍雲飛

夢

夢入長安道  
萋萋盡春草  
覺來春已去  
一片池塘好

督山伯蕭遠和詩并示舍弟

愛閑多病老封戎  
看子垂天上碧空  
懶惰未須攀此老

典型政爾賴諸公鬢如震澤三春綠詩似芙蓉五月紅  
坐此逃禪天可恕不應獨許我乘風

寄老商

先生昔據通元峯咳唾珠玉家為空只今江西二三子  
可到元和六七公雙鬢只期他日白千花猶是去年紅  
須君吸盡西江水不假扶搖萬里風

夜作呈諸公

風江舞暮帆野樹散歸鳥寒燈上壁角疎星綴林杪歸

來靜無事獨坐按默藁放筆有新功無人與傾倒不知  
新恨多但覺舊愁少石鼎倚殘爐茶煙看清裊明朝尋  
酒錢折簡喚諸老

暑夕乍涼

三旬埃鬱得清風領袖猶翻汗摺紅已是夢清無俗夢  
更移涼簟月明中

遊北李園

雨映煙籠萬竹蟠枯條高下不堪看非千秋後多霜雪

自是芙蓉不耐寒

贈謝無逸

君不見城南千樹桃君不見澗底百尺松  
松生偃蹇卧霜雪桃李一笑隨春風  
百年澗底終自若桃花猶得暫時紅  
嗚呼志士每如此衡門高卧不見用心  
雖無瑕飢欲死

寄知止材仲

一門叔父到卿好中表兄弟惟爾賢  
往事關心空自語

新詩好句與誰傳  
溪山已近堪投老  
文史雖窮莫取憐  
仲弟墓頭今宿草  
為渠先賦補亡篇

梅

南雪看未穩  
北風吹已殘  
才堪十年夢  
不稱一生酸  
日  
月方回首  
風霜已憑欄  
遲明出謝客  
頓覺帽圍寬

苦陰

破臘冬仍在  
逢正陰更頻  
寒流未解凍  
雪意欲妨春  
畏  
病還踈酒  
逃寒懶見人  
郊東小桃李  
別是一番新



贈泐上人

一菴便送淵明老四海共傳摩詰詩  
本自妨人枕邊夢不能陪汝劒頭炊  
交遊大半飢寒裏疾病中分少壯時  
西寺木魚東寺鼓三年三見泐闍黎

正月十二日夜作

春來消息未真傳久負蒲團一味禪  
燈火侵尋作佳境冰霜偃蹇過新年  
江聲悞落三更雨野色遙看萬斛田  
咫尺風光不相貸忍令好語到愁邊

正月十三日河堤上作

雨著河堤柳著煙小樓燈火又今年東風不與行人便  
留滯長亭十里船

昨日晚歸戲成絕句呈子之兼煩轉示進道文  
疎燈欲盡漁商市小雨似開桃李顏一夜簷聲鳴鑿盎  
無人知我坐蒲團

卧病江邊久未回嬾隨兒輩走塵埃天公尚有餘情在  
肯放梅花自在開

春愁如故妨人樂  
舊蘚新苔不暫晴  
想見江郎閉船卧  
蒲川風雨報天明

上元夜招沈宗師不至聞已赴郡會作二絕戲之

燈火蒲城公不來  
為誰雕句洗塵埃  
春愁不到城西寺  
更約梅花緩緩開

白酒紅燈稱意春  
知公未免踏黃塵  
繩牀好在休相憶  
輸與瑯琊浹上人

正月末雪中有酌

柳著河冰雪著船小挑應誤取春憐牀頭有酒須君醉  
又廢蒲團一夜禪

追成舊作

蒲江風月一船霜無計留君只自狂燈火隔簾香隔坐  
無人知是竹枝孃

晚春即事

春色不自惜晚寒摧折之殘花帶雨去薄霧信風吹尚

有尋行債初無了事癡論詩得奇味當使阿戎知

廣陵

借韻戲用  
文潛體

往來六十里各是一江郊柳色團渦岸春風揚子橋好  
山當斷浦野鳥度空巢一任雷塘路暮天風雨號

沈宗師甚喜江梅而微貶荼蘼因成一絕

澹綠衣裳玉作妝好風涼月自相當沈郎笑汝多情在  
不似江梅滿意香

勸張李二君酒

張侯好詩如好色不敢為主而為客李侯好酒如好詩  
心雖甚壯無人知兩侯風味俱不惡如芙蓉與木芍藥  
午窗留客著筆快曉枕無人猶睡著廣袖漸變天寶妝  
天字不作元和腳世人譏笑乃其分政是仍叔之子弱  
病夫坐穩無所求荒簷斷雨鳴春鳩爐煙未盡消百憂  
恨不緩帶從公遊何時清江橫小舟與公一醉荻花秋  
卻來密庵參牧牛

庵居

鳥語花香變夕陰稍閑復恐病相尋  
正應獨有江山分  
素自都無廊廟心  
堂上老親雙白髮  
門前稚子舊青衿  
兒曹不會庵居意  
古澗寒泉凝至今

登舟

夜雨曉猶滴  
怒風晴更吹  
已無行役念  
寧有別離悲  
舟楫三年路  
江山一月期  
東菴舊還往  
不廢百篇詩

張禕秀才乞詩

白蓮菴中張居士  
夢斷世間風  
馬牛風塵表  
物自無意

神仙中人聊與遊澄江似趁北城曉苦雨不放南山秋  
君當先行我繼定向吳東亭留小舟

讀太真外傳

上盡馬嵬路東風吹舊京乾坤已新主草木自秋聲錦  
鞦千年恨皇輿萬里程寧知挽船士亦有別離情

簡寧子兩絕

只恐老去被花惱更欲忘憂須酒澆何似山堂病居士  
閉門高枕過春朝



新晴欲上南樓月柳可藏鴉水蘸牆無限客愁芳草裏  
不知風雨阻斜陽

贈泆上人一上人

君行南山南我住北山北不聞浴鵠白但見染絲黑老  
境欲垂垂快意須得得孰知百雉堅而有一日克泆如  
澗底松縱老終不踣一如雲間鶴不復可羈勒余如千  
里風過此兩鴻鵠明珠脫氛翳曉日破昏塞宿障不盡  
除胸次猶筆墨君看說詩口乃是杖山力冷霜卧偃蹇

歲月飽封殖誰能窺藩籬未易得閩闕政當磨其鋒共  
埽煩惱賊相從無何鄉敗衲依破棧更令好事人妙語  
添一則

雨後月夜懷沈宗師承務

雨雲攬江色偃蹇破昏睡千花閉紅紫妙見一室內披  
衣行夜永明月在船背微風過蕭瑟古柳立蒼翠脩然  
一蒲團堅坐覓詩對我生無南北所到意輒遂孰知十  
年遊保此清淨退頗念城北人結友老杉檜漫隨長缺

歸甘作短檠棄出門萬里塗已駕安得稅何當持被來  
把酒相就醉

秋夜示李十

晴鳩不時鳴雨鳩不暫歇相去跬步間屢見履齒折寒  
泥擁衰草秋扇罷殘熱今晨好風景稍貸屋頭月清光  
冷相照玉艷滿金玦喚客坐前窗文字相溲雪殷勤傍  
詩律未暇了麴檠瀾翻談經口邂逅如意鐵我歌君輒  
書字字有行列不須陞抵嚴但要兵衛設譬如南山石

琢齒當井漑真成一戰霜未可三鼓竭人生各涇渭世  
事亦勝薛高堂食肉人兩馬方踈齧何知緼袍底猶有  
不安節

中秋日沈宗師約遊城西泥雨不果

遂阻城西步兼懷雪下遊長風掠歸燕苦雨應鳴鳩月  
向誰邊好寒催社後秋傳杯有新韻能憶老兄不

九日晨起

漸歇毆蚊手真成把酒天長河印曉月老木聚荒煙了

了江山夢區區文字緣南堦兩三菊極意作今年

王氏郊居

江山處處好落日極登臨雨續蔬畦潤風吹柿葉陰客  
船頻上下水鳥故浮沈尚有南飛鴈丁寧可寄音

對菊

稚子尋花莫漫狂已知衰疾負重陽新霜有意留青藥  
更放殘枝十月黃

遇子我泊船舊亭

江郎泊船處草徑不勝秋客裏終年別春前萬斛愁山  
橫采菱口月滿望江樓政可夢春草莫令吟白鷗

望金陵偶成絕句

臺城南望入斜陽尚想能詩玉樹郎乘興風流莫相笑  
眼看直北是雷塘

雷塘別有風流在可作南舟兩日行江水自流春自好  
不知芳草為誰生

烹茶

水光欲盡瑠璃影  
玉色初浮翡翠斑  
便覺麴生風味好  
小樓新火對蒲團

西樓

小院無人日自長  
隔簾時有芰荷香  
客遊未作安居計  
更借西樓一夜涼

秦處度一上人同宿  
密菴處度為上人畫斷崖  
枯木圖

小巷無客亦無羶  
遂有高人借榻眠  
一夜西風撼枯柳

不知春在石崖邊

寄謝無逸并汪叔野兄弟

老謝風流綠綺琴小汪兄弟亦南金文章已悞半生事

江海畧酬他日心好酒不當愁偈仄舊書差慰病侵尋

平生恩義泮宮老斷縷寒泉百尺深

汪信民沒  
方數月

寄朱時發

菱橋脊梁硬如鐵天下拄杖打不折倒騎佛殿出三門

南頭學來北頭說昔苗未生今作米更判阿師三尺觚



公但吸盡西江水莫怕庭前簸箕尾

事出小  
釋迦錄

與材仲弟相別於白沙東門之外悵然久立不能自釋乃知謝安石作惡之語不過也因成奉寄可見別後氣味亦可并示京洛間親舊也

終年想顏色未有食頃忘君寧不我愈苦畏冰雪妨斯文百戰罷閱士如堵牆孰知五湖口一葦可以杭

盛欲與子談乃復為此別忽忽得餘歡把酒到耳熱人生不如意肝胆有楚越何知若人胸中有積立鐵

伯姑無恙時令我與子友周旋以至今各有遺種臭文字重聲名於身亦何有還書問兩弟是事君識否

婦如先姑賢兒似乃翁好識君相與心見我亦傾倒頻年作離情悞賞到丘嫂卜鄰洛水陽此語當在蚤

往者汪信民愛我不自勝以我如古人得與子並稱若士不復有斯言當服膺期君極膏沃更作無盡燈

鍛以百鍊鋼淬以萬里流閉門待彊敵忽見天地秋以石投水中萬歲終不浮堂堂倚松老於今忘百憂

遣懷三首

何山不堪隱何家不可居  
古來子華門亦著荷畚夫  
荒田脫積雨未能供晚租  
今日視昨日但見有不如  
故人勸加餐老親憐嗜書  
寧知毛錐子不可一日無

秋風襲殘暑忽過江上林  
旦日扶杖來不見十畝陰  
蔬畦甚寂寞亦受霜雪侵  
念此不常好如我夙昔心  
濤頭落崩岸野鳥助謳吟  
潛魚著沙底避網冬更沈

異時忘言人馬鬣今宿草  
平生不如意欲伴寒木槁  
遂

令蔡菟腸更盡組繡巧三年對空案誦子詩可飽從來  
文字工不解顏色好相逢期後身再記西院老

伍胥祠

伍員廟前一丈碑上有野鶴雙來棲水雲香杳涼去遠  
風雨冥冥秋到遲江花相趁野花發舊燕不隨新燕歸  
丈夫遺恨竟何許楚越勾吳今是非

東園

垢汙久思出江山秋更親荒田圻龜兆老檜落龍鱗風

月猶堪夜蒲蓮浪作春籃輿亦乘興實自厭冠巾

即事戲答李一

斜陽著高柳環堵半黃昏小圃三年旱荒池一尺渾麤  
知詩有味寧使婦無禪不信鬼公子猶招楚夢魂

有懷宿州城北因作詩寄材仲

宿州古城城北隅雨罷晴開如畫圖雜花亂藥未須道  
白杏一枝天下無香風裊裊入短袖明月蕭蕭隨蹇驢  
二年不復見此樂清江萬頃正愁予

湘江竹

小雨催寒入夕曛  
湘江風味可憐人  
斑斑玉淚無時盡  
裊裊金梢別是春

示沈宗師

九日狂陰一日晴  
落花飛絮作清明  
與君攜手南樓去  
共聽長江月下聲

戲成兩絕奉簡章仲孚兼呈宗師

日日鶉鳩相應鳴  
年年春草趁愁生  
道人不怕冰霜面

又作南舟十日行

沈郎愛客如愛酒  
章子問詩如問禪  
官共寒爐撥殘火  
共按佳句作新年

揚州雍熙寺納涼

高樓有餘涼  
但見旗腳動  
鳥語蒼角來  
仰聽風響弄  
江山舊還往  
草木老賓從  
平生一笑適  
可得萬鈞重  
脩然六尺牀  
更許佳月共

山光寺前泊舟值雨

輕雷喚小雨憶在白沙時綠酒留連醉紅燈取次詩好  
風那復有涼月自相隨獨上山光寺清歌無柳枝

揚州留一上人

日日東風吹客衣小園春在捲芳菲殘花過雨飄零盡  
好鳥穿林自在飛往事虛成采薇瘦故人頻有食言肥  
知公未厭西行晚且伴江船緩緩歸

送一上人之京師

東風吹雲十日雨卧聽城頭打衙鼓道人遠自山中來



共坐南窗濯泥土自然高韻到羲皇豈止微言變齊魯  
萬牛回首不震掉一葉橫江且掀舞未能入水取蛟蜃  
尚欲提戈代貔虎念公守此非一朝木病魄癩無挂條  
已盡千峯西嶺雪更夢八月錢塘潮京城塵沙深一尺  
是中莫留公履跡權門噂啗兒女笑我亦思之不能食  
片帆無事蚤歸來為公一洗山中石

擬古

狡兔死三窟老松堅百尋物生各有願共此分寸陰荒

城六月旱長江三日霖稻苗不遂死幸無蟲賊侵皇天  
不私覆一語鎖百壬先王典型在落落傳至今願以小  
人腹而為君子心

寒雞不能晨苦雨自朝夕上為雲雷巢下乃龍蜃宅坐  
懷陰外天缺月挂殘魄少來可喜人牖戶陳玉帛平生  
千萬言畧省二三策牛山所種木日在斤斧危念君十  
年心使我雙鬢白

寄李商老

竹不可一日無酒不可飲不醉平生嗜酒兼愛竹此意  
不許凡兒會南來經年飽塵垢袖手甘隨百夫後文章  
漫作無功身只了兒曹補窗竇黃沙障日江漫流青山  
喚我十年舊憶昔泊船鵝翎口把酒遙為故人壽只今  
身在心已老千巖想見靈芝秀君家兄弟固不凡解挽  
二友勤相就中郎卧病過春晚昔則酒狂今詩瘦山房  
大名不墜地諸老風流未宜棄老檜參天可乞盟梁食  
餽羹乃無味如君高韻千載同可更托身二數公丈夫

勁挺要長久百萬叩關一夫守胸中江海不須道此流  
何必計升斗眼前勃窣訴二友聽客所為公絕口

雨中作

咄咄真成夢悠悠復未知寧為牛背語不作劍頭炊雨  
挾秋聲亂江含暝色悲故知無事飲猶勝頃來詩

示內

貧賤不可忘富貴安足羨我生未三十種種厭貧賤宦  
情肱九折老味金百鍊稍回功名心未結香火願平生

所知人久已焚筆硯是中無真實不在儒術緣有如退  
飛鷁更借送風便病妻頗癡絕可與共開宴小女真吾  
兒語學春鳥嘒初非本來有且作夢中見君看手提鼻  
絕勝扇障面他年從我居同入隱士傳

京師贈大有叔

尊酒相逢十載前綠髮紅顏俱少年尊酒相逢十載後  
皮黃肉皺俱白首叔如鴻鵠但高飛姪似麕鼯更深走  
南來行李初一逢長安舊第冰雪中閉門不識故人面

豪氣直欲輕元龍平生為道不為食少小所期皆目擊  
何時相就遇江南同訪曾遊舊泉石

聽琴

君不見龍門之下百尺桐飄霰飛雪愁寒空何年班迹  
落君手小窗伴坐歌南風恍然如著山巖裏不知身在  
塵埃中初聞平野飛鴻鵠歛聽金盤起珠玉遶壇古樹  
鬱嵯峨六月吹霜作寒綠折柳黃華不須道別鶴離鸞  
尚堪續君不見開元天子醉西都音聲十院留歡娛當

時臨軒奏此曲徑須解穢煩花奴乃知恬澹世莫識五  
絃之趣何時無歸家愁厭箏笛耳此聲一聽運已矣會  
須流水訪鍾期試向爐中覓焦尾

雨後

新花欲盡竹當欄喜見空牆野色團稚子乘陰時蘭菊  
僕夫留水灌萋蔓茶香于汝初無分酒熟逢人也彊歡  
惱亂春光君會否小瓶猶占一枝殘

同晁季一李天紀遇沈宗師於北莊因成長韻

三年城南居不識城北土但聞玉雪郎去作猿鶴主今  
晨籃輿來握手相勞苦勝遊有佳士洗耳聽妙語晴窗  
背雲壑落日在環堵晚風生白楊想像原野古斷崖老  
懸木小港聚寒雨卻觀城市人努力自熬煮畏途出社  
席禍福有未覩杜陵懷北遊無忌笑豪舉二者覓真是  
政恐君未許千秋柴桑翁妙句聊一吐

學視

學視覩懸蟲病耳聞鬪蟻紛然酬六鑿萬劫費揩洗君



看杯中蛇妄想從何起忽然一妙語初無彊料理回觀  
積年疾乃是一念使誰能明此心香山老居士

如臯道中

客路三日雨頗知袍袴單長河貫沃野薄酒動新寒晚  
日魚鰕市秋風藜藿盤衰顏定可笑不必鏡中看

海陵雜興

萬事不如意自然生白鬢極知少餘韻何敢厭窮途土  
俗尊魚婢生涯欠木奴東行見李白誰為致區區

西歸舟中懷通泰諸君

一雙一隻路傍堠乍有乍無天際星亂葉入船侵破衲  
疾風吹水擁枯萍山林何謝難方駕詩語曹劉可乞靈  
酒盞茶甌俱不厭為公醉倒為公醒

夜坐

所至留連不計程兩年堅卧厭南征荒城日短溪山靜  
野寺人稀鶴雀鳴藥裏向人閑自好文書到眼病猶明  
較量定力差精進夜夜蒲團坐五更

雨後至城外

日日思歸未就歸，只今行露已霑衣。  
江邨過雨蓬麻亂，野水連天鸛鶴飛。  
塵務卻嫌經意少，故人新更得書稀。  
鹿門縱隱猶多事，苦向人前說是非。

苦雨

雨添東澗連西澗，雲斷前山起後山。  
野水到門人去盡，昏煙迷樹鳥飛還。  
江天日月渾無色，客路風埃只彊顏。  
舞石至今隨燕乳，裁詩不復哭龍慳。

柳州開元寺夏雨

風雨瀟瀟似晚秋，鴉歸門掩伴僧幽。  
雲深不見千巖秀，水漲初聞萬壑流。  
鐘喚夢回空悵望，人傳書至竟沈浮。  
面如田字非吾相，莫羨班超封列侯。

謝勝

一作亭

尉送梅

破帷冷落不禁風，疾病深藏稱懶慵。  
忽有梅花來陋巷，喜聞春信出初冬。  
未須趁雪爭先覩，尚恐衝寒不滿容。  
會約君家好兄弟，他年尊酒更相從。

孟明田舍

未嫌衰病出無驢尚喜冬來食有魚  
往事高低半枕夢故人南北數行書  
茅茨獨倚風霜下杭稻微收鴈鶩餘  
欲識淵明只公是邇來吾亦愛吾廬

丁未二月上旬日

庀運雖云極羣公莫自疑民心空有望  
天道本無知野帳留華屋青城插皂旗  
燕雲舊耆老寧識漢官儀

兵亂後雜詩

晚逢戎馬際處處聚兵時  
後死翻為累偷生未有期  
積憂全少睡經劫抱長飢  
欲逐范仔輩同盟起義師

羽檄連朝暮戎旃匝邇遐  
未教知死所詎敢作生涯  
東郭同逃戶西郊類破家  
萍蓬無定跡屢欲過三巴

萬事多翻覆蕭蘭不辨真  
汝為誤國賊我作破家人  
求飽羹無糝澆愁爵有塵  
往來梁上燕相顧卻情親

蝸舍嗟蕪沒孤城亂定初  
籬根留弊屨屋角得殘書  
雲路慚高鳥淵潛羨巨魚  
客來缺佳致親為摘山蔬

擬古樂府

高堂陳八音同聽不同樂狂飈送鴻鵠萬里翔寥廓一  
去三十年事事非前約當時綠綺琴塵埃無處著時節  
非不久此意但如昨

別離行

城頭草木日夜黃九月北風天雨霜月色入戶侵我牀  
美人乃在天一方舊遊可樂不可忘恨君不隨鴈南翔  
恨妾塊守此空房曉風忽來吹夢長夢中與君還故鄉

黃金為屋玉為堂與君更笑億千場不須合佩雙鴛鴦

秋夜行

八月九月啼寒蟹十月北風天雨霜客遊無聊思故鄉  
書來不來空斷腸鴻飛何為蒲夕陽舉頭攬取明月光  
置我堂上方尺牀蒲酌玉杯碧淋浪喚取姮娥來共嘗  
人間歡樂壽命長不須辛苦老桂傍

田家樂

東家西家蠶上簇南邨北邨麥向熟小兒腰鎌日蚤歸



大兒去就田間宿斗酒相邀不為薄鄰翁相對且斟酌  
聖主當陽億萬年年歲歲田家樂

宿楚丘懷石子植顏平仲趙材仲

暮行楚丘北適與寒雨會旅舍一尺泥又乏芻秣費故  
人渺天涯客子初夜至披衣附殘火煮茗當晚饋昏昏  
傍孤枕悄悄入清睡向來談笑聲已若異世事但覺舌  
本間尚有宿酒味鴻鵠乘秋風意在網羅外彊飯無多  
談此語敢失墜

河隄

平田接長河眼界起突兀今日並隄行麥隴青已出客  
行不知晚但感此節物新霜被西山久厭塵土沒坐懷  
故人面於此見髣髴

濟陰寄故人

柳絮飛時與君別南樓把酒看新月月似當年離別時  
柳絮隨君何處飛千書萬書要相就思君不見令人瘦  
念君情意只如初顧我形骸已非舊朝來有信渡黃河

鴈足繫書多網羅城南城北芳草多明月如此奈愁何  
久雨路絕賓客稀少聞后土祠瓊花盛開亦未  
果一往也

卧聞更鼓溼不鳴曉窗但有推檐聲雲橫不放山入座  
風怒欲倒江衝城東家酒熟花爛漫折簡喚客留娉婷  
街頭泥潦一尺許意雖欲往無由行儒生活計亦不惡  
蒲團堅坐到日落映窗香穗觸凝塵過眼文書開病膜  
明朝新晴有佳處穩看小檻翻紅藥無雙亭下一枝春

玉潔霜清未寥廓閉門嬾出君莫笑看汝多愁我獨樂  
故人無事儻能來為君試舉舒州杓

黃池西阻風

烏雲銜日日不出驟雨飄風吼三日扁舟寸步不得行  
坐歎輕鷗如箭疾我行去家秋復冬故園回思春夢中  
客愁茫茫若江水生計渺渺隨征鴻三年京塵共憔悴  
一杯此地難從容長溪卷浪雪花碎遠山橫空眉黛濃  
故人別我江上去亦有書來喚同住破屋數間君有餘

太倉五升我已具嚴霜未放鷹隼擊盤渦恐致蛟龍怒  
片帆欲挂任篙師君但徐行莫深懼

夜坐有感

五更月落雞未鳴小爐殘火猶晶熒道人疆起理衰疾  
不聞松聲聞雨聲跣趺坐穩百念去豈有宿夢令神驚  
平生於世萬事嬾況復今茲飽憂患中原北望四千里  
三年不見南飛鴈著身天涯未為遠所至風沙莫深歎  
時寒但附僧房火日暖可赴鄰家飯嶺南無瘴便可老

江頭有酒猶堪喚，嗟哉甯子不自休。辛苦飯牛過夜半，

京師新鄭與諸晁兄弟往還前後數詩

夜語不嫌久，凜然天欲秋。客燈吹屢滅，細雨落還休。未許金張並，虛為鄆杜遊。江湖少歸夢，知為故人留。

我髮日已短，公愁安得長。牆根春薺老，瓶水蠟梅香。侍立無天女，相隨有漫郎。平生湖海興，今夜宿連牀。

令弟窮顏觸書生，老仲舒相招得共處。何往更安居，歲月塵埃外。桑麻雨露餘，送行無別物。圮上一編書。

閒居

風土遙人住，依棲縣令尊。  
摘山春晚苦，汲澗雨餘渾。  
白日供高枕，生涯付小園。  
時來攜白鏟，種藥兩三根。

將發金陵奉懷張彥實

老矣君何往，翩然我欲歸。  
文章晚未用，歲月事多違。  
江接鄱陽路，風吹遊子衣。  
不應遽伯玉，獨悟昔年非。

春晚

柳暗鶯啼春正妍，斷塍分水灌平田。  
花開花落幾番雨。

山澹山明一抹煙  
突兀初晴雲外寺  
橫斜欲晚渡頭船  
天涯因愜滄洲興  
何用區區苦自憐

寄宣城故舊

宣城經歲無他事  
尚喜交遊不棄遺  
疊嶂樓頭納涼處  
宛陵堂下探梅時  
君今尚要一囊粟  
我去亦無三徑資  
歸卧雲山最深處  
因書頻報故人知

與吳迪吉諸人赴晁季一陳塘范園之遊因成

十韻



春風未寂寞頻枉故人車客舍輕寒下邳煙宿雨餘曉  
紅留隱映新綠上扶疎妙墨懸高榜殘章得舊書蛟龍  
忽舒卷草木自清虛渺渺登臨地悠悠水竹居只今那  
復有本自不關渠塘水空遺廟鬣淙亦故墟同行喜佳  
士所到即吾廬政恐習池飲風流卻未如

題蘆鴈扇

鴈下秋已晚江天風雨微寧為聚沙立不作傍雲飛

夜

夢短添惆悵更深轉寂寥如何今夜雨只是滴芭蕉

梅花

白玉花頭碧玉枝水邊林下雪晴時暗香別有闌情處  
卻是春風未得知

潘邠老有滿城風雨近重陽之句謝無逸詩云  
病思王子同傾酒愁憶潘郎共賦詩蓋為此語  
也王子立之也作此詩未數年而立之邠老墓  
木已拱并無逸窮困江南感歎之餘輒成絕句

好詩政似佳風月會賞能知已不凡萬里潘郎舊鄉縣  
半江斜日落歸帆

松

一夜風霜萬木枯歲寒惟見老松孤秦皇不識清高操  
疆欲煩君作大夫

泊舟宿州城外縱步至城北遂過天慶觀道士  
留飲乃歸

冰霜連暮春既雨寒愈重扁舟纜荒亭淺水咽微凍今

晨稍和柔始覺芳意動經旬厭拘束樂事須一縱籃輿  
無俗情鷓鴣夷當賓從千花犯濃雲紅紫相餞送未知滕  
薛長乃若鄒魯閔娉婷此門柳別淚作淒痛陵陂少荒  
蕪亦未妨耕種道人喜我來清談破昏夢彈琴不須弦  
風林助吟諷嫩玉擣香秔浮蛆撥春甕嘉蔬翦朝露奇  
果市新貢西鄰亦可人明窗碾雙鳳人生一飽適此外  
更何用七年城北交事與朱阮共長詩不成篇臨行當

三弄

竹友集

謝邁字幼槃自號竹友臨川人與兄無逸並以詩文稱時號二謝呂本中嘗云無逸詩似康樂幼槃詩似元暉蓋未敢有所優劣也性嚴毅不伍於俗在崇寧大觀間極為學士所推重詩集原本不傳茲為萬曆時晉安謝肇淛從內府祕籍中錄出者

與諸友汲同樂泉烹黃蘗新芽

尋山擬三餐放箸欣一飽汲泉注銅瓶落磴碎鷹爪長

為山中遊頗與世路拗矧此好古胃茗椀得撥攪風生  
覺泠泠祛滯亦稍稍夜深可無睡澄潭數參昴

王坦夫靜寄齋

狙猴在深山騰踔不少停大龜藏神屋縮首都無營冥  
觀靜躁異洞見萬物情吾聞子王子總角遊帝城歸來  
鬢猶綠閉關慕淵明曲肱北窗下風聲蕭泠泠夢覺忽  
驚起猶疑車轂鳴齋居屏萬慮乃以靜寄名是中得其  
趣若門可長扃儻知靜能應子冠猶可纓鏡以靜故明

水以靜故平茲言置座右可配崔瑗銘

示何之忱

往年君別去上馬愁凜冽今年見君面揮汗驚執熱吾  
曹雪點鬢忽忽值晚節云何會心侶乃作如許別昨朝  
聞扣門梳髮不暇結開門問無恙欲語聲屢咽君家嬌  
小女可念真如雪朝嬉繞君傍忽作泡幻滅念我谿堂  
老誰能續此絕嗟哉溪澗毛瑣細不容擷相逢顏未開  
苦語心已折吾人要解事視世一蟻垤共將煩惱緣一

付廣長舌君歸數過吾不厭酒屢設人生浪自苦豈不  
愧前哲

送董彥速遊仙巖

吾聞天竺峯聳若在天上峯前溪萬仞激石吼寒浪堂  
中老比丘碧眼照林莽徜徉君屢遊局趣我思往此行  
何所求豈欲除二障聞呼試回頭未可踏折杖茅簷燕  
寂地山氣日夜爽不斬凌霄藤君歸藤自長

寄題雲卧庵



聞君不事事枕簟信所便卧形先卧心心靜形晏然復  
壁非不完加以甃石堅其如方寸亂一夕嘗屢遷榮寵  
萃一門寧免百慮煎雖有水精屏何由得安眠章葉踏  
謠孃連臂在榻前何如山中人編茅卧山巔白雲宿簷  
間對鏡心自捐我亦遺垢氛曲肱寄林泉茲庵儻壽吾  
一睡要經年

初夏觀園中草木

翠葉蕃夏初清陰勝花時閉關軌長埽步屨屢相窺青

青溪中蒲移植井之渚下有九節根服食可不迷往時  
手種桃只今與簷齊枝間有美實少日將成蹊采菊香  
蒲簷擷薺甘如飴籜龍露新綠倚梧長孫枝觀身要若  
蕉衛足當如葵節憐孤筠直惡戒蔓草滋天津白玉郎  
看花驚洛師吾人守環堵草木相娛嬉逍遙各自適慎  
弗相唐嗤

喜劉世基至

君家飛猿西我家躍馬北躍馬望飛猿渺若千里隔十

載一會面一年三寄書書中無賸語只有問何如去年

秋風初君馬秣雲卧

名庵

鵠立望君來迴鞭不我顧今年

薰風後取道凌雲來

名山

解鞍愒我廬握手慰我懷胸中

所韞藏言下皆傾倒挽留莫息息索去還草草堂有鶴

髮母室有蓬首妻屋前虎豹怒屋後鼪鼯啼遠遊縱未

歸旅寓安得久三年勞夢魂一日接杯酒君歸太蚤計

此樂未易辭人事雖多乖興盡當語離壯時須摩厲老

矣但跛蹙荃蘭本同芳霜雪有一節君識飛猿句

飛猿嶺即

謝康樂詩中所謂猿嬌也

我和躍馬詩

躍馬泉荆公嘗賦詩

他時兩相寄抑亦

慰我思

中秋示座客

去年中秋時我病起復仆苦遭水帝子百計推我去牀  
前客問病草草壺觴具酬獻呼稚子應答煩老嫗今年  
幸彊健佳節欣會遇況有座上客蕭散如鷗鷺尊前清  
興發豈數飛蚊聚南山又朝隴晚雨細如霧難追阿連  
玩徒咏希逸賦陰晴天下同吾事亦何豫不須淵有珠

遑恤食無免人無百中秋對月復幾度幸逢方外交姑  
樂酒中趣君看清夜徂草上已多露

雨後秋山

宿雲散層陰秀色還疊障如將螺子綠畫作長蛾樣光  
浮竹木杪影落簷楹上何人妙盤礴澹墨寫屏嶂五絃  
豈須撫衆響亦清亮我病不出遊素壁倚藤杖舉觴酬  
羣峯歲晚一相訪

同董彥光陳妙音遊安樂寺

著鞭蒼崖陰下馬古寺門老僧乞食去獨瞻無上尊相  
將二五人盤礴共一尊境靜悟塵垢林香識蘭蓀何年  
鉢羅老同訪花柳邨鳥能貫珠歌花能折腰舞老人如  
帝江識此真律呂擊節復長謠急觴猶插羽春風已趣  
裝行樂更幾許吾人但取醉何必浪自苦

顧凱之醉道士圖

虎頭癡絕自不癡丹青妙處手得之石嵒戲畫幼輿子  
酒狂更貌黃冠師一人坐睡真被酒二人杯杓不停手

一人回面愁不醕二人直視開口笑  
上有醉墨書者誰翰林手題獨酌詩  
題詩真識醉時味畫圖如寫詩中意  
珍藏不換一斛珠李詩顧筆今世無

題文與可畫竹

我昔居西園手植竹數个凜然如德友  
節行不敢破朝吟玩雪枝夜聞蕭瑟清風吹  
一旦忽不見似覺塵土汚人衣  
竭來翠雲麓日惟見山不見竹  
雖云山氣日多佳尚恐無竹令人俗  
昨得與可畫自掃塵壁挂門開風動

之如枉故人駕對山看畫信不惡何人更覓揚州鶴

王摩詰四時山水圖

欲知摩詰詩中畫桃紅柳綠皆摹寫更含宿雨帶春煙  
一段風光生筆下欲觀摩詰畫中詩小幅短短作四時  
山平水遠含變態是有句無人知此公盤礴萬物表  
胸中細細秋空曉戲磨澹墨汗絹素世上丹青擅場少  
何人乞與朝川圖裝成小軸四時俱壁間仍題六字句  
人言雙絕古今無



集菴摩勒園會者十人以他年五君詠山王一  
時數為韻得時字

生涯水中萍漂蕩信所之十年餬其口不食故園葵思  
歸同越鳥長是巢南枝祭竈郭北隅小屋如雞棲園開  
十肘地草木方華滋紅榴媚夕陽初篁搖輕颺招我賞  
心舊於馬持酒卮合離如日月果有弦望時詩壇失老  
將一鼓氣已衰賴我如虎賁典型猶在茲相歡且盡醉

莫詠驪駒詩

成德不面逾月僕以病暑未能出謁輒和所寄  
藁字韻詩奉寄兼東子中

門前蓬藿無人埽客去牆陰藜莧老我家城北君城南  
相憶何其挂懷抱不聞叔寶方外談澄也何因今絕倒  
知君不作避暑飲閉門亦深荒徑草鉤章棘句日吟哦  
玉軸牙籤時探討邇來聞草鹿脯帖盛湘十日虛蘋藻  
摻摻丸藥恐不免俗客縱譏何足道恨我猶嫌襤褸嘲  
不敢熱行唯夢到君收奇功翰墨林筆陣可埽龍駒島

願言不學司西公萬事逢人盡稱好我詩燕石初不如  
浪欲珍為夜光寶殘暑促趣行造詣曉來涼氣迎秋蚤  
定邀隣舍廣文公同聽誦詩傾腹藁

懷覺範上人

道人心與貌俱古哦詩不復效等伍清疑仙掌露華墜  
新似秋空玉鉤吐要將餘事付風騷已悞元機窺佛祖  
泐潭老子乳於兔果在叢林嘯風雨何當埽室祇樹園  
夜看金盆聽軟語我雖不是龐德公嬾駕柴車入城府

公如歸結白蓮社留我山邊一廬許

喜汪叔野見過

大汪權奇汗血駒小汪連翩鸞鷲雛垂頭未遇伯樂顧  
覽輝將下朝陽梧豈知青衫埋朽壤更令斑鬢因泥塗  
喜君翩翩過我廬握手借問今何如苦云難遂白髮志  
謁來翻作青衿汙急呼歡伯置座側解顏談笑聊相娛  
語及阿兄平日事往往雪涕長歎歔怪君長不滿六尺  
高談似是胆滿軀且寬是事飲此醕逢人但作鞏囁嚅

苦留君住騎勿驅明朝酒盡為君酤更闌月落起浩歎  
四面宿鳥驚相呼

陶淵明寫真圖

淵明歸去潯陽曲杖藜蒲屨巾一幅陰陰老樹嘯黃鶯  
艷艷東籬粲霜菊世氛無盡過眼空生事不豐隨意足  
廟廊之姿老蓬華環堵蕭條僅容膝大兒頑鈍詩書  
小兒嬌癡愛梨栗老妻日暮荷鋤歸欣然一笑共蝸室  
哦詩未遣愁肝腎醉裏呼兒供紙筆時時得句輒寫之

五言平澹用一律田家酒熟夜打門頭上自有澆酒巾  
老農時問桑麻長提壺挈榼來相親一尊徑醉北窗卧  
蕭然自謂羲皇人此公聞道窮亦樂容貌不枯似丹渥  
儒林紛紛隨溷濁山林高義久寂寞假令九京今可作  
舉公籃輿也不惡

田父招飲不赴

萬錢供食如嚼蠟百壺載酒如飲水要知自古窮達人  
脫畧世味皆如此經旬不逢南鄰伴曲肱聊寄北窗底

田父剝啄扣我門頗應昨夜燈花喜殷勤攬衣謝父老  
陶令愛酒今朝止伏雌可殺葵可羹他日薄飯招鄰里  
吾君恭儉似文帝勿為酒醪傷穀米

喜雨

是日聞  
改元

涉冬無一雨元冥阻驕陽上田塵沙飛下田蒲稗荒鉏  
犁不入土龍具挂壁牆邨居巷無井抱甕汲長江汲多  
恐流絕無以飲牛羊昨宵天意動浮雲霾月光灑然潤  
物功洗蘇及枯楊先帝劔弓冷小臣涕淚滂屬聞建中

號謳歌騰路傍雨從膏澤沛風與和氣翔山林獨何幸  
豫喜霑稻梁尚能賦時雨激烈歌阜康

余賦野香亭前木犀花二小詩盛稱此花之妙  
而江迪彝賦梅花詩以友之往返倡和十數篇  
二花優劣未決故復長韻示之

君不見杜陵布衾冷如鐵朝來米盡炊煙絕偶然乘興  
江上行無奈被花惱不撤城南陋巷在江涘讀書蒲團  
生蟣虱吟成少陵七字詩酷愛梅花似冰雪竹友道人



端可嗤頷髭如棘手如龜從來口業洗未盡醉吐狂辭  
歌木犀賞花自是少年事出口未覺吾儕癡我今束縛  
喙三尺勿與世俗爭妍媸空花遍世不礙眼澹如雲水  
老禪師

感白髮

吾昔年始冠已有一髮白作賦數百言嘲罵等戲劇只  
今尋舊作一字不復憶恍然如夢寐了不見往迹但有  
鬢間絲冉冉如堪織南方地平溼壯歲多老色行年四

十二髮鬢那容惜洗蘇將拔白諱老嗟何益一染復星  
星此語記阿客人人生光景促候忽如敲石詩成亦贅語  
感歎初無得後應不識今今已不識昔

寄題王立之賦歸堂

小官五斗米達官五鼎食均有懷祿心細大各封殖疾  
驅挽不還此輩車轂擊王侯厭綺紉雅意在山澤頗賦  
歸去來作堂慰休息似聞一尊酒醉眼分青白何時上  
君堂酌酒話疇昔和君五字句想望柴桑陌

寄饒次守

我初卅角時聞有饒進父

次守舊破衣下里舍應書不字進父

破衣下里舍應書不

得舉要是磊落人白眼看法度吹笙彈箏篋餘事能律

呂市人惡少年往往爭笑侮掉頭出里門徒步大梁去

蒯緱謁王公敝貂走風雨十年不還鄉無人問死所客

從北方來喜氣滿眉宇探懷出君詩字字粲璣珎筆蹤

入顏柳句法窺李杜奇偉可畏人我輩誰比數借問從

誰遊一一英俊侶我家阿夷兄詩有春草句說君不離

口恨我識君暮帝城十二衢素衣染黃土食貧出無車  
羈旅亦良苦束書蚤歸來隻雞祭墳墓沉聞霍將軍尚  
有陳氏母銅山鬱嵯峨其下原臚臚我思結茅舍帶經  
學農圃他日如買鄰定可連牆住頗聞君卜婚我亦未  
有婦要如子柳子各娶老農女東市買杯杓西市買筐  
筥南市買綆缶北市買甌釜生理能稍稍來往辦雞黍  
兩家如有子男女互嫁娶從來不識面便作平生語但  
緣臭味同請君莫訝許

汲古齋

人言曲誤周郎顧豈謂周郎真好古長歌短調各風流  
說盡心招及眉語頗聞汲古用脩綆乃知餘事工律呂  
君軀三尺膽如斗欲窺唐虞探鄒魯頃來長安閣畫眉  
時人半額相媚嫵天姿潔白惡丹鉛獨有溪頭浣紗女  
要知學者用心處不追時好乃如許君家有井千尺深  
容我時攀轆轤否

寄李商老

所思定何方渺然羌山麓別來經一年不寄書一幅憶  
在元真館與君同飲缸論文久未去夜雪打寒窗明朝  
款君門篋輿踏殘雪尊前聽君談意氣排凜冽雪中兩  
相過把酒俱留連豈同剡溪去興盡回酒船今年走東  
吳無復相邂逅遭回行路難歸已三月後逢君所知人  
頗嘗問君安猶聞卧苫塊毀棘今樂樂君家所嬌兒聞  
已去懷抱昔我嘗見之瑤瓊寶娟好我歸卧衡門愁苦  
亦如君淋雨子桑病敝冠原憲貧此懷其誰語思君何

能已寄聲勞苦君兼問兩季子

喜董彥速自仙嵒歸

鉢囊高挂同僧夏  
遠寄嵒間一把茅  
地僻狙猴長作伴  
食貧蕨筍不充庖  
瘵藤任挂萬峯頂  
野鶴來歸千歲巢  
檢點篋中詩幾首  
蒼頭持遣為君鈔

聞無逸兄下第歸

豐林分手各銷魂  
兄弟傷離況玉昆  
初為過都留虎脊  
又令點額向龍門  
往聞淮北雪花大  
歸值江南梅雨昏

欲寄短書無別語年來花柳自邛邛

莫莫堂新竹

僻寂漏茅屋蕭騷新竹枝徑迷人不到蔭密鳥還知綠  
色匆匆換薰風細細吹即看柯葉老不受歲寒欺

晚春書事

春來畏病不飲酒孤負山南山北花有客款門驚剝啄  
無人追韻得車斜獨酬砌下二三子豈憶城南韋杜家  
不畏詩窮嫌水庀時時按句煮新芽



未曾留客十觴醉已是飛花三月時  
忽悟病來真老矣  
儻逢聖處亦中之眼前用意半乾沒  
世上忘形皆白癡  
誰似陶翁有名酒呼兒覓紙又題詩

懷祥首座

師在羌廬西復東無心還似鳥飛空  
月鉤雲幕今何處  
禪板蒲團只眼中未悟竹間鳴瓦礫  
擬隨童子問鈴風  
前身儻是胡居士打破虛空對詔公

畫卧

書魔纔挽睡魔推鼻息俄驚吼怒雷夢到逍遙大庭館  
不堪簷外鳥驚回

剝剝啄啄無俗客  
清清泠泠多好風  
一枕本無憂樂累  
何須遊宦大槐宮

夏日遊南湖

麴塵席與草爭綠  
象鼻筍勝瓊作杯  
可惜小舟橫兩漿  
無人催送莫愁來

書懷

賴有書遮眼初無客就談身閑惟取醉髮短僅勝簪學  
僻今何用囊空寶不貪老師行駐錫準擬問前三

招汪叔野

夜語僧窗雪載塗別來夏木又扶疎兩牛鳴處地非遠  
萬竹陰邊吾所廬兒能竊聽從忘算子盍徐行可當車  
莫訝南鄰狂處士摻搨傾坐一軒渠

次劉世基韻

孔世已傳三十八諸孫猶自見長身試將後謝追前謝

豈料今人媿古人  
華子岡頭千疊秀  
劉郎詩律一朝新  
吾家碧澗紅泉句  
聊欲煩君作後塵

用前韻和董彥速

得句可傳千古意  
揆奇攻苦百年身  
河梁贈別初無對  
錦里吟春復有人  
我已汗顏驚手縮  
君猶瓊樹賞朝新  
從今習氣須磨盡  
二字惟當悟客塵

聞呂居仁病未瘥覓使寄問

消渴文園苦病多  
蕭條子美卧江沱  
士窮不過古如此

天寶欲為人謂何忠義名家忝申許文章秀氣望岷峨  
期君煉玉煮白石色比嬰童何啻過

懷鍾陵舊遊

五年二度過鍾陵馬上春風醉裏醒南浦江波迷眼綠  
東湖煙柳半天青從來地域歎卑薄怪底山川終炳靈  
又見徐家有高士他年重作聘君亭

送王坦夫由淮南入京

王郎乘興上扁舟數遣書來寫我憂奏牘三年待金馬

卷簾十里夢揚州  
桃花水漲理歸楫  
蓮葉杯香消客愁  
白髮倚門長望子  
細君應賦大刀頭

李簿家有侍兒妙麗善歌舞諸人惜其死為賦

詩子亦賦一首

草頭朝泣露溽溽  
樵歌暮歸丘隴寒  
當時座上客半醉  
琵琶不許近簾彈

久旱喜雨

誰言旱魃敢奪雨  
師權瀾漫谿流漲  
瀾翻屋雷懸占

年豐擺種快意滌袪延踈嬾知何幸茅齋穩晝眠

次韻無逸兄見示

憔悴誰能賦大招會將菌桂雜申椒巷南鄰里頻相過  
水北山人詎可邀細酌敢謀長袖舞苦吟空咏寸岑遙  
耕耘賴有陶潛婦不羨孫郎對大喬

立夏日作

小簟含風六尺牀竹奴從此合專房吾身匏落都無用  
占得山間一味涼

慰得絺衣一番新幅巾輕軟最宜人花時氣暖長愁夏  
竹裏風微又勝春

夏日書事

蒼虬蟠礎溼生雲翠竹搖風水有紋涼卧北窗呼不省  
蟲飛遶鬢夢中聞

飲酒示座客

身前不吝作蟲臂身後何須留豹皮劬勞母氏生育我  
造化小兒經紀之牙籌在手彼為得塊石支頭吾所師



偶逢名酒輒徑醉兒童拍手云公癡

贈別董彥速

人間底處異蘧廬莫莫堂中豈定居我尚滯留君去速  
荒園三畝夢歸與

欣同衆鳥托吾廬投杖行當歎索居不是酸寒孟東野  
我言能聽果誰與

悼亡

舊聞林下趣既見即心降月冷同秋夢燈寒對夜窗那

知身是幻深念涕如江仰歎朝飛雉微禽亦有雙

呈無逸兄

漢儒章句文勝質魯國衣冠實愧名但遣詩書長在眼  
可令聲利苦關情咄嗟茗飲有時辦夢想溪堂何日成  
舟泊寒沙卧明月此期終欲與君盟

食菜

道人真是伊蒲塞頓頓園蔬入饌來紫芥寒菹參薤韭  
黃橙苦酒伴鹽梅蒸豚不羨貯人乳飯豆亦能羹芋魁

但恐酪奴不解事攪令枵腹轉春雷

暮春二首

溜渠鳴玉雨成霖春草池塘數尺深後院落花人不到  
無聊獨下海棠陰

晚雨牆東暗綠槐清陰庭院鎖莓苔委堦紅藥將春去  
貼水青荷與夏來

春日黃梅花

傍人如笑不勝妍曾是尋芳向臘前縱使遊蜂能拂掠

含酸結子為誰圓

送都仲獻

酒曹懷璧暫投閑  
俄許朱轡未賜環  
殿閣涼生應在眼  
宮門騶唱合趨班  
鳳皇觀德翔千仞  
虎豹窺人礙九關  
只恐蒼生傾望久  
未容投紱老家山

寒日出郊

水晴鷗弄影  
沙軟鳥驚塵  
密竹斜侵徑  
幽花亂逼人  
徐行聽格磔  
倦憩倚輪囷  
往事悲青冢  
年年芳草新

哭無逸兄

溪堂載酒地無復故人車  
敗壁龍衣委荒畦馬齒踈  
淒涼閉關賦淪落廣微書  
但有清風在時時為埽除

寄題長沙高善時醉月堂

亂山岑秀繞湘濱  
君築茅堂底處邛蠻國  
干戈真夢幻  
醉鄉風露別乾坤  
平生不負南樓興  
何日能同北海尊  
聊欲揮毫書楚夢  
憑君招取獨醒魂

山間

籬落秋花未得霜  
嫣然一笑媚秋陽  
可人風味撩詩興  
不記姚家宮樣黃

移松

古貌蒼髯十八公  
巍巍獨出衆材中  
朝來挽致茅堂下  
為我商量送好風

獨登有美堂

龜趺雙峙日星懸  
讀罷憑欄心浩然  
繚繞峯巒浮野色  
參差樓閣起晴煙  
湖光淨照山間寺  
江浪遙連海外天

安得翰林風月手一時摩寫入詩篇

秋興

雨隔千山暮風驚一葉秋  
朱顏傷露槿青眼賴沙鷗  
畏酒悠揚夢因詩點染  
愁有懷誰與語扶病獨登樓

觀李伯時陽關圖

坐對丹青傷別離  
淚和朝雨想頻揮  
道邊垂柳年年在  
看盡行人長不歸

以牛膽漬槐子還董之南

解牛得膽大如斗投以元槐功更加來歲青袍映綠髮  
不妨看盡九衢花

棣華館小集

楊甲字鼎卿重慶昌州人大觀時遊京師頗有聲望  
嘗仕於蜀旋以事去官寓居靈泉山中故其詩有微  
官也謫居之句棣華館小集一卷多遊覽弔古之作  
其詩天矯脫俗孤光冷艷不著色相如遊長松寺云  
青山有驕色斯客不能句宿安靜觀云石泉瀉幽潔



意寂不肖喧俱不食人間煙火語也

合江汎舟

莫踏街頭塵寧飲城東水江頭放船去葦間問漁子岸  
深魚有家鳧鴈在中止得酒可以歌得樹可以艤年年  
舟中客顏色不相似風波無前期遊者亦如此短篙醉  
時策遠山卧後几老我不奈醒日落西風起

遊長松寺宿石門僧舍以石門霜露白為韻得

露字

疾風吹輕衣駕我雲脊路人間一回首驚絕不敢顧鳥  
投虛無底森森不知處蜂窠螳丘蛭與世同所驚試看  
一蒼莽誰有不平慮尚憐野僧屋佛面荒苔蠹斷崖劃  
牙吻洶洶崩石怒我來得奇觀拄杖叩巖樹青山有驕  
色斯客不能句平生二三子慰我一相遇娟娟松間月  
幽夕亦可度夜闌更小語風逼遺響去酌君無多酒繼  
以木蘭露

宿安靜觀

青山轉龍脊，矯首西南天。上有仙人祠，臺殿飛後前。下見雲雨興，樹色暗平川。仙人兩黃鵠，一去無歸年。向來道上復人著，幾何錢一朝聞羽化。悵望空流涎，卻揮囊中金瓦礫。來投捐巖巖，化金碧香火。通雲煙人間萬事爾，旦暮有愚賢。而況爭奪場，轉手分婞妍。仙人一回首，破隴與荒阡。紛紛不足道，哀此區中緣。石泉瀉幽潔，意寂不肖喧。夜聞松風露，起坐心寥然。

與客遊滄浪亭得一字

露回林蒼黃漲落水寒碧西郊好風景曉霽千里色相  
從二三子灑埽溪上石主人信愛客沽酒炊玉粒揮觴  
一再行弄此竹間日跳波醉中舞野唱寒外急牛羊歸  
恩恩鳧鴈來一一頽然寄天放不受世褊迫永懷堂中  
翁回首千歲跡豈無獨往願乃為飢凍逼霜空洞庭野  
天闊雲夢澤欲窮扶桑枝尚挂滄漣席何當從茲去旦  
暮生羽翼

靈泉道中

荒雞不知林落日明鴉背山行曲折盡稍出喬木外前  
峯近相向禿缺不可蓋泉石微斷續渚澤亦多派牛羊  
深墟落稚子翳蓬艾稻秧碧剡剡遮隴無疆界今年田  
夫喜飽飯我亦快猶慙食無功舉箸再三餽何當磨腰  
鎌助爾芟稊稗

寒食遊學射山

疾風吹沙天茫茫日落未落原野黃山空無人石碌碌  
路長馬飢石齧足荒臺古林翳雲族何人剗崑縛層屋

當時萬騎填山谷至今拾寶多遺鏃故國山川愁遠目  
人世悲歡風雨速凌高舉酒天為感手攀崑樹叩雲木  
何人唱我淒涼曲興亡一眼冥冥綠野水平蕪飛鴈驚

臘日遊梅龍得樹字

年年看梅水西路白頭溪翁眼如故重來攀髯老不死  
我亦風埃憶歸去酒酣百怪入我腸夜半恍惚與龍遇  
醉騎一尾天上歸陳迹江頭不知處梅花勸汝一杯酒  
千歲寒凝真旦暮欲將老大傲風雪穴蟻窠蟲已無數

成都萬事更奇古石筍猶疑卿相墓孔明廟前柏千尺  
神物脩脩泣幽樹它時滅壞亦同歸人生誰能一長顧

庚寅再遊

霜郊馬頭鞭影西欲尋遠梅無舊蹊但聞草木皆有香  
未到已識花前谿艤舟登岸入梅處竹樹煙火茅茨低  
百年死樹蟲蘚暗鱗甲漠漠僵橫霓老翁鼻祖頭雪白  
下見兒女方勝筭數株無力已仆地彊起放春花滿畦  
痿龍夭矯欲仙去脊尾一半埋沙泥雷公幾時獵幽蟄

夜半刀斧來剗剗野人往往多再拜疑有鬼物憑其棲  
問樵訪牧不知歲齡齷已見今耄倪故人同遊六七輩  
或似醉阮林中嵇繞樹覓花不識路東邊犬吠西號雞  
楹中但有酒清濁寒具野擔勤提攜誰言猶是蜀梅苑  
破丘斷隴山蒿藜種花滿地作癡計隨手變化空塵翳  
只餘老樹香不滅力戰風雨猶堅屣何時江邨一曲路  
與子共賦歸來兮

靈泉山中



小縣相籠合濛濛數百家果蔬爭晚市樵牧亂晴沙  
落日平江迴青山細路賒偶居無事在隨意問桑麻

野色山圍盡風煙更可憐客情牛鐸外農事藕花前  
聚汲松根井寬愁石底泉寧須計升斗詩興自超然

勝地仙靈宅微官也謫居焚香他日夢隱几向來書  
小睡便山雨長齋稱野蔬逢人問無恙滿意說樵漁

日下溪林薄芊芊蕭晚暉閉門成石隱小水亦生肥  
醉著谿藤杖歸來木葉衣狂歌有虎兕吾道只應非

何處長松寺雨花雲外臺山從百曲轉路入九關回老  
檜成龍盡殘柯借鶴來人間斤斧亂風壑夜聲哀

靈泉山上晚望

野曠樹還亂林深煙更微天隨殘日盡雲掣斷山飛玉  
壘風煙闊秦城草木非憑高無限事今夜客裳衣  
遠目昏難盡青山闕展園眼花隨處亂雲樹一時飛秋  
至客愁遠路難心事違更憐人北望不見鴈南歸

登待鶴亭

橫峯亂嶺如奔蛇前者欲起後驅呵危亭獨立一回首  
天罅雲隙皆收羅手攀落日意不盡目送孤鴻愁更多  
秋風衣裳客未冷我欲飲酒君當歌

謁朱真人祠


一濯巖下溪再拜巖中庭清風蕭然來吹我衣上腥仙  
人芙蓉冠乘月下雲輶山空雜珮響靜夜朝百靈似聞  
客欲去小語猶丁寧肅肅上松柏急以兩耳聽寂寥古  
壇外但挂斗與星天明恐是夢恍惚遺心形去飲石上

水再讀幽人銘青山無行跡霧雨松冥冥

遊山上廢寺有段文昌種松石刻云乾坤毀則  
無以見寺寺不可毀四松其遠乎寺今廢木亦  
亡矣感而賦之

木落石出荒山臺上有佛寺孤崔嵬斷椽枿瓦無四壁  
古佛已倒何人推野蜂占窠挾肩背山鼠出穴銜髯顛  
老僧見我欲愁哭野葛蔽路官能來文昌種松有斷刻  
石柱半裂荒莓苔老翁鼻祖無一在獨樹晚出非耆鮐

乾坤未變已先滅幾見石火翻狂雷至今野叟鑿山破  
石窟尚有龍筋骸當時手種意已遠欲與草木為渠魁



宋百家詩存卷十二